

Dielangana dia Meji pa Lumu Luimpe lua Yone

No. 26

Yesu udi usamba bayidi bende

Mitshima yenu kaizakadi; nuitabuje Nzambi, nungitabuje meme kabidi. Mu nzubu wa Tatu wanyi mudi miaba ya bungi ya kuikala; bu bualu ebu kabuyi bulelela, nakadi kunuambila; nenye kunulongoluela muaba. Binaya ne binanulongoluela muaba, nempingane kabidi, nenuangate kundi meme muine, bua kundi ngikala, nuenu nenuikaleku kabidi (Yone 14:1-4).

Mu nshapita 13 ne mvese 36 Simona Petelo wakakonka Yesu ne, “Neuye kudi kunyi ? Yesu wakamukudimuna ne, Katataka kuena mumanye mua kundonda kunaya, kadi pashishe neundonde. Petelo wakamukonka ne, Mukelenge, munyi mudi tshiyi mumanye mua kukulonda katataka ? Nenkufuile. Yesu wakamukonka ne, Wewe neunfuile, anyi ? Bulelela, bulelela, ndi nkuambila ne, Tshitale katshiyi tshianze kusama, wewe neumpidie misangu isatu”.

Katataka bayidi badi banyingalala bualu bua meyi a Yesu bua lufu luende, umue wabo Yudasa, wakadi muena mutungidi, Mukelenge wakamba bua bupidia bua Petelo, mitshima yabo yakalubakana.

Mukelenge Yesu kena wela meji bua kanyinganyinga kende, udi wela meji bua bayidi bandi. Yeye nkayende udi pabuipi bua kushiya bayidi bandi ne kupingana kudi nzubu wa Tatu wende. Udi usamba mitshima yabo ne meyi a busambi.

Dipingana dia Mukelenge Yesu bua bantu bandi

Mukelenge wakabapesha mulayi bua kupingana bua kungata bantu bandi bua kuikala nende mu nzubu wa Tatuende. Paulo udi wamba bua bualu ebu mu mukanda wende kudi Bena Tesalonike. “Bualu bua Mukelenge muine neapueke mu diulu wela diyi dikole, ne diyi dia muanjelo mutambe bakuabo bunene, ne diyi dia mpungi wa Nzambi; ne bantu bafue mu Kilisto nebabike diambedi; ne pashishe tuetu batshidi ne muoyo badibo bashiya netuangatshibue nabo popamue mu matutu, bua kusangila ne Mukelenge mu lupepele; nunku netuikale ne Mukelenge tshiendelele. Bua mianda eyi nusambangane ne meyi aa” (1 Tesalonike 4.16-18). Bena Tesalonike bakakudimuka kudi Nzambi, bakalekela mpingu yabo “bua kukuatshila Nzambi wa muoyo ne a bushuwa mudimu, ne bua kuindila Muana wandi ulualua mu diulu; wakabisheye munkatshi mua bafue, Yesu mene, udi utupandisha ku tshiji tshilualua (1 Tesalonike 1:9,10).

Toma udi ne dikonka

Nudi bamanye njila wa kundi nya. Toma wakamukonka ne, Mukelenge, katuena bamanye kuwaya, tudi bamanye nshila kudi kunyi ? Yesu wakamuambila ne, Meme ndi bianyi njila ne bulelela ne muoyo; kakuena muntu udi ulua kudi Tatu, kayi muanze kulua kundi diambedi. Bu nuenu banmanyane meme, nuakadi kumanya Tatu wanyi kabidi; nudi bamumanye katataka ne tshiendelele, nuakumumona (Yone 14:4-7).

Yesu wakambila Toma ne yeye biende wakadi njila ne bulelela ne muoyo. Kakuena muntu udi ulua kudi Tatu, kayi muanze kulua Yesu diambedi. Kakuena njila mukuabo.

Dikonka dia Filipino

Filipo wakamuambila ne, “Mukelenge, utuleje Tatu, ebu mbualu butudi basue. Yesu wakamukonka ne, Filipino, nakadi nenu musangu bule nunku, wewe kuena munmanyane, anyi ? Wakutangila meme wakutangila Tatu; apu munyi muudi wamba ne, Utuleje Tatu ? Kuena witabuja ne, Meme ndi munda mua Tatu, Tatu udi munda muanyi, anyi ?

Tshiena ndiambila, meyi andi nuambila; Tatu udi muikale munda muanyi utu wenza malu andi. Nungitabuje ne, Meme ndi munda mua Tatu, Tatu udi munda muanyi; binuikala kanuyi nuenza nunku, nungitabujile bua malu mene antshidi ngenza ” (Yone 14:8-11).

Bayidi ba Yesu bakamana kutangila Tatu, bakatangila Yesu. Nzambi udi Nyuma, kadi Mukelenge Yesu wakadi panshi pa buloba bu muntu. “Ne kakuenza mpata ya bunene bua bualu busokoka bua buimpe bua Nzambi: Nyeye wakamueneshibua mu mubidi wa muntu, wakabingishibua mu nyuma, wakamuenebua kudi banjelo, wakambibua munkatshi mua bisamba bia bende, wakitabujibua pa buloba, wakangatshibua mulu ne butumbi” (1 Timote 3:16).

Yesu udi ubalaya Nyuma Muimpe

Nendombe Tatu, yeye neanupe Musambi mukuabo, ikale nenu tshiendelele, Nyuma wa bulelela mene udi ba pa buloba kabayi bamanye mua kuangata, bua bobo kabena bamumona, kabena bamumanye; nuenu nudi bamumanye bua yeye utu wikala nenu, neikale munda muenu. Tshiena nushiya bana ba nshiye, nempingane kunudi (Yone 14:16-18).

Muaku “Musambi” mu Lumu Luimpe lua Yone ne muaku “Muakuidi” mu 1 Yone 2:1 idi muomumue mu Buena Gelika. Idi yamba bua “muntu udi wimana pabuipi bua kukuatshisha mukuabo”. Pakabanda Mukelenge Yesu mu diulu, wakashikija mulayi wende pakalua dituku dia Pentekoste. Nyuma Muimpe udi Mukuatshishi wetu ne Muakuidi wetu panshi pa buloba, Mukelenge Yesu udi Mukuatshishi wetu mu diulu ne Muakuidi wetu kudi Tatu (Ebelu 9:24. 1 Yone 2:1).

Dikonka dia Yudasa (ka Isakaliote)

Yesu wakambila bayidi bandi ne, “Udi ne mikenji yanyi, udi uyenza, ngudi munsue; Tatu wanyi neasue wansua, meme nemusue kabidi, nendimueneshe kudiye. Yudasa (ka Isakaliote nansha) wakamukonka ne, Mukelenge, bualu kayi buakulua buwadimuenesha kutudi, kuyi udimuenesha kudi ba pa buloba ? Yesu wakamukudimuna ne, Biansua muntu, nenze diyi dianyi; Tatu wanyi neamusue, tuetu netulue kudiye, netuikale nandi. Udi kayi munsue kena wenza meyi anyi; diyi dinudi nunvua kandianyi, ndia Tatu wakantuma (Yone 14:21-24).

Bena Isalele, bu tshisamba tshia bantu, bakapidia Yesu, kabitabuja bimanyinu biakenzeze bikajadika yeye wakadi mutumbibue kudi Tatu wende pa buloba.

Mukelenge Yesu wakambila Yudasa ne “Musambi, Nyuma Muimpe mene, watumabo kudi Tatu mu dina dianyi, yeye neanuyishe malu onso, neanuvuluije meyi onso anakunuambila” (Yone 14:26). Pakalua Nyuma Muimpe, bayidi ba Yesu bakavuluka malu onso abakunvua kudiye. Bakadi bantu bakole mu ditabuja. “Bakaya, bakamba bualu bua Nzambi kuonso; Mukelenge wakabenzeja, wakajadika diyi ne bimanyinu biakabalonda” (Mako 16:20).

Yesu udi ubapa ditalala

Ndi nushila ditalala, ndi nupa ditalala dianyi; tshiena nupadi bu mudi ba pa buloba banupadi. Mitshima yenu kaizakadi, kayitshinyi. Tshiena nuambila malu makuabo a bungi, bualu bua mukokeshi wa buloba uluahua, yeye kena nanyi bualu munda muanyi; kadi bua ba pa buloba bamanye ne, Ndi musue Tatu, ne bu muakampa Tatu mukenji, nunku mundi ngenza. Bikayi, tuye (Yone 14:27,30,31).

Katataka Yesu udi uya bua kudifila mu bianza bia bena lukuna bandi benzejibua kudi Satana, mukokeshi wa buloba, ku makenga ne lufu, ne bua kushikija mudimu wa bupikudi

mumupeshibue kudi Tatu wende. Kadi Mukelenge utshidi wela meji a bayidi bandi, udi ubapa ditalala diende.

Mukelenge Yesu wakavuija “ditalala ku mashi a ku mutshi mutshiamakane” (Kolosai 1:20). Nunku tudi mua kumanya ditalala dia bushuwa, ditalala dia Yesu ne ditalala dia Nzambi bualu bua Mukelenge wetu Yesu Kilisto (Lomo 1:7).

***“Nzambi wa ditekemena anuuje tente
ne disanka ne ditalala dia mu ditabuja dienu,
bua nuenu nukumbane mu ditekemena
mu bukole bua Nyuma Muimpe”
(Lomo 15:13).***